

四庫全書

史部

欽定四庫全書

皇朝文獻通考卷八

田賦考八

水利田

乾隆十二年直隸總督那蘇圖奏霸州豐潤二處
營田宜設專員以收實效

上曰古有田畯之官巡行阡陌勸稼課耕宣布德化該
督所奏專員經辦營田尚得古人遺意著照所請令

管理之員親身督率加意經理如三年之後果能著有成效該督奏聞送部引見

十三年

諭江南淮海一帶州縣近年屢被災傷推原其故皆由山東沂郯等處上游雨水盛漲建瓴而下河道不能容納遂直注駱馬湖衝決六塘河兩岸子堰淹浸民田以海沐為歸宿小民蕩析離居甚屬可憫但查從前淮海所屬不盡失收即山東亦非盡無雨水盛漲

之事何以至今為患愈劇而山東之以旱潦見告者亦迄無寧歲必係該省水道所在梗塞蓄洩機宜久廢不講以致本處既告漫溢鄰境俱受淹傷相因為害至於如此上年阿里衮奏請開濬沂蘭等河朕命大學士高斌前往會勘查辦是否通盤籌畫可以永免兩省災傷抑係暫為一隅補救之計細閱伊等前後奏摺大槩加意修築堤埝而於該省全局及淮海一帶相因受害應作何疏濬料理未據詳悉議及著

傳諭大學士高斌左都御史劉統勲會同該撫阿里
衮將山東全省水道窮源竟委廣諮博訪躬親履勘
務將近年所以致患之由并將來作何查辦毋致再
被漫漫延及鄰省之處悉心定議該省見在加恩賑
恤倘前項工程之外有應舉行者即照以工代賑之
例隨宜興作俾災黎稍資生計亦一舉兩善之道也
高斌等言山東登萊青曹四府見無宣洩機宜可
言濟南東昌泰安兗沂五府境內皆有運河而武

定各海口則分洩運河盛漲入海之尾閘也運河
受漳衛汶泗沂之水兩旁承以諸湖水小則開湖
以濟運水大則藉湖以受水其間山泉支港閘壩
涵洞橋梁斗門皆有關於蓄洩今議德州哨馬營
滾水壩宜落低以消漳衛之盛漲海豐之馬頰河
聊城之徒駭河宜疏導以分運河之漲東平之戴
村二壩宜落低以減運河漲溢之水濟寧之董家
口宜引入白馬河歸湖濟運以衛民田沂州之江

楓口宜築堤壩使入湖歸運以免旁溢至於沂河以南下注江南之駱馬湖但使山東之運道泉湖安流順軌即下游淮海之地亦可減免水患矣疏入下廷臣集議從之

又

諭據直隸總督那蘇圖奏稱正定府屬之平山令郭殷正於河旁度地勸諭居民自備工本營治稻田共九十二頃餘又阜平縣境內有大沙河濁流該令羅仰

鑛沿河查勘督令居民實力墾營田五十餘頃於河道無所妨礙郭殿正羅仰鑛殫心民事朕甚嘉焉宜交部議叙朕自即位以來於凡開墾水利以及樹藝孳畜之事無不諄諄詰諭而至今未有收令董勸有方如今那蘇圖所奏者則是各督撫及羣有司尚未明曉朕意也且此平山阜平二邑之民處山區瘠土而能不惜辛苦墾荒成熟至萬有餘畝是民亦知謀生加以勸導無不風行著各省督撫實力勸諭有司

金史卷一百一十五
卷八
懋勤本圖無俾怠緩其有成效優敘例此苟或以熟
作荒及將河湖灘地留以瀦水者妄行開墾致盛漲
無所容納反受漫溢之患則國法具在不假借也

十五年

敕河臣督臣會議淮北修築圩岸事宜御史胡蛟齡言
江南之邳宿贛沭諸州縣皆淮水下流而海州上
承東省來源下鄰海浦每春夏之交栽植甫畢水
患隨至有種無收率以為常宜倣江南圩田之法

多為溝洫使足容水查乾隆十一年議海州等屬
令有司勸民修築圩岸數年以來作何辦理情形
乞下督撫諸臣確切定議疏入

上令總河高斌總督黃廷桂會議尋據高斌等議言臣
等查得海州及沐陽安東宿遷三縣築圩挑溝已
經工竣阜寧贛榆二縣亦已勘明興修桃源清河
二縣四鄉均係旱地並無水田圩岸有費無益竊
思水利農田相為表裏圩岸之制誠為良法惟是

地勢不同難以一律而論海州上承駱馬湖之水
由六塘沐山兩河分注入海從前民間自築圩堰
後經奏請動帑加築費至數十萬然遇山水盛漲
之年民田無論有無圩岸均不免於水患誠以來
源甚多下流甚窄容洩不及勢必橫溢不能強與
水爭也至於圩岸之制惟宜於蘇松常鎮等屬其
次則高寶興泰山鹽諸縣行之亦有成效蓋上游
無異漲之水故圩岸得以施功若海州等八州縣

在黃河以北一望平衍土性浮沙不宜禾稻民間
惟恃春麥向有一麥抵三秋之諺一交夏秋則上
游山水泛溢六沐交漲非圩岸所能禦臣等思水
性地利之宜不容穿鑿而補偏救弊之方不可不
盡所有各州縣已成之圩岸仍令有司督率民夫
歲修至沙高土鬆并卑窪容水之地均不能强行
修築如此則淮徐海各州縣春麥既可歲獲豐稔
秋成則合計數年之內亦可一二年有收庶沮洳

之地隨時補救水患可漸減矣

十六年

諭曰朕經過淮安見城北一帶內外皆水雖有土堤為之防而人煙湊集之區設經異漲其何以堪亟應改建石工以資保障著確勘詳估及時建築毋忽

令於高梁橋迤西營治水田大學士傅恒等言高梁橋迤西近河地畝俱可營成水田請交順天府并派內務府官勘定經理從之

詔疏濬京城內外水道

又

諭曰朕今歲南巡浙江見蕭山會稽一帶河道淺窄復
聞夏旱之時河流淤涸舟楫難行朕思疏濬河道本
以便民若乘此時以工代賑開通深廣足垂永久之
利該督撫即行相度估計奏聞辦理外此或有當疏
濬興工之處該督撫次第酌量修舉俾貧民得資餬
口

二十一年

諭據楊錫綬奏荆山橋河身淤淺出水甚少以致滕嶧等縣積水難以宣洩今歲孫家集黃流漫溢淤墊河身致荆山橋下過水不能通暢自宜設法疏浚俾附近田廬永免淹浸著總河白鍾山悉心查勘奏聞辦理

二十二年

命侍郎夢麟勘視荆山橋工程

築駱馬湖隄河道總督白鍾山等言微山昭陽諸湖遠承豫東二省之積潦近受黃河北岸之漲水見已疏通荆山橋上下河道由王母山入運而來源既大運河盈滿勢必歸入駱馬湖湖北受沂州諸山之水西受微山湖水其尾閘居六塘河之上游今湖隄存在殘缺亟請修築以資捍禦從之敕建海神廟於杭州省城

詳見鄒社考

以江海大溜直趨中

小壘兩岸沙灘日長瀕海諸邑無水患故也

又

諭山東之濟寧金鄉魚臺滕嶧五州縣上年被水地畝
見已涸出補種者不過十之二三其餘或雖已涸出
而泥濘難於耕種且積水一二尺至五六尺不等者
此時若能亟為疏濬尅日消退晚禾收豆尚可乘時
布植使再延至五六月間則大雨時行愈難經理矣
頃巡撫愛必達自江南來奏稱荊山橋至小梁山一
帶水勢通溜無阻徐州城東狼矢溝積水一百六十

餘項已經開放四五日內即可涸出是下游既已疏通積水即當宣洩何以此五州縣內尚有水深至五六尺者耶著鶴年速赴荆山橋一面知會夢麟白鍾山同至工所會同查勘速為妥協籌辦務使農民得以補種晚禾以慰朕念江南山東地界毗連救災恤患事屬一體兩省大吏不可稍分畛域沛縣等處亦應一律查辦

又

諭六塘河以下為沂沭諸水下游見有餘潦停積桃源宿遷諸縣阻黃臨運為堤堰所隔積水無由宣洩窪地多成巨浸農民失業堪憫或應添建滾壩或應酌建涵洞或開導溝渠猶為陂澤水減一分則民間受一分之益著侍郎夢麟率該道吳嗣爵等速行確勘次第妥協辦理至下河高寶諸湖之水入江入海各有分途小港支渠排比行列但或淤或淺以致水無所歸不特沿海興鹽七邑被其患而高寶首當其衝

城垣廬舍亦重為可慮當使近江者入江近海者歸海條理井然深通暢達不致汎濫田畝則所全實多嵇璜請於昭關設滾壩一座滾壩之下復開支河南關舊壩改建滾水石壩此項工程并一應支河即著嵇璜率同何燭董其事

又

諭曰朕此次南巡親蒞河工為積歲被災羣黎籌疏洩之方捍禦之策者宵旰靡寧冀收實濟近據山東巡

撫鶴年奏報山東之金鄉魚臺等州縣未涸地畝尚
有一千餘莊因思此方積潦再經伏雨秋霖將益苦
汎濫而上江之宿虹靈壁等處河南之永城夏邑等
處在在皆有積水計漫淹地界不下數百里此其受
病非一朝一夕驟致蔓延蓋其始皆由於地方官漫
不經心偶遇水災不亟為籌度日復一日因循釀害
積水日益增淹地日益廣以致高下田廬盡成巨浸
及至受害既深自非大動帑項厚資工力不能奏效

而大小各官又莫能深悉受害之由確得祛患之術
惟恐議疏議築虧帑遺累遂爾噤口束手坐視其民
為魚而莫展一籌見今水患已不可勝言若不及時
徹底籌辦將來何所底止著侍郎襄曰修馳驛前往
山東河南上江積水各州縣往來周視寬以時日熟
察情形諮詢輿論勿憚再三其在山東者與鶴年會
商在河南者與圖爾炳阿會商在上江者與高晉會
商其地方官有熟悉水道之員聽其酌量差委務在

通盤籌辦無分疆域凡可以登民衽席計安全而謀
樂利者果歸實用毋惜多費帑金朕痼瘵一體南顧
疇咨輟轉憂勤之思皆諸臣所共悉其深體而共勉
之以副委任

令江南督臣等辦理湖河修濬各工程嵇璜言淮
揚運河東隄減入下河之水自邵伯以北者皆歸
海邵伯以南者皆歸江下河入海之路從前所建
各閘丁溪小海地勢外高不能洩水其草堰劉莊

伍祐新興等場分注鬪龍港新洋港等口歸海皆
得地勢之宜今請於伍祐場之蔡家港添建五孔
石閘二座挑引支河歸新洋港入海又石碇閘天
妃越閘裏頭塌卸應請修補各閘下支河年久淤
淺應請挑濬射陽湖形勢灣曲應引使徑直趨海
泰州之孔家涵鹽城之岡溝河皮盆河皆應浚治
運河東堤之郎兒閘子嬰南閘邵伯三閘年久傾
圯應請拆修此皆下河歸海之路也但湖河水勢

歸江近而歸海遠歸海紆迴而歸江徑直多一分
入江之路即少一分歸海之水運河入江之路芒
稻閘董家溝石羊溝廖家溝四處閘壩共寬八十
六丈邵伯以南運河東堤舊設金灣六閘金灣滾
壩東西滾壩東西灣壩鳳凰橋壁虎橋灣頭閘諸
處共寬九十餘丈上下相應以導水入江今止有
金灣六閘并灣頭閘過水合計七閘口門僅寬十
二丈八尺尚不如芒稻東西二閘之寬應將金灣

滾壩金灣北閘改低一尺東灣壩改低二尺五寸
鳳凰壁虎二橋下淤灘挑深東灣壩添寬十二丈
壁虎橋之上另開河頭十二丈匯入壁虎橋引河
內又邵伯諸湖遞注之引河亦多淺阻應將湯家
絆引河改向西南王家莊東首另挑引河引朱家
湖入尤家窪下接挑新河一道由蕪城墩引入越
河此皆湖河歸江之路也至於宣洩機宜惟在冬
春初夏若六月以後江面既高潮汐又大雖盡開

閘壩而洩減無多且山盱五壩寬三百三十丈又益以蔣家壩十八丈而歸江閘壩止八十餘丈來水幾五倍於去水必須長年開放寸寸洩減俾高寶諸湖豫留過水之地斯不至壅溢為患而芒稻閘河為鹽艘必由之路閉閘以濟鹽運則河工坐誤啟閘以利湖河則鹽船或阻查灣頭至丁堰之運鹽河道淺深不一甚有淺至尺許者應請一律挑深以芒稻西閘底水深五尺為度使鹽河長存

五尺之底水則鹽船可以過行而沿江閘壩可以
長啟矣疏入

諭曰嵇璜奏湖河宣導機宜并應疏應修各工一摺頗
中肯綮運河減洩之水歸海路遠歸江路近然亦有
不能歸江之處此皆南巡得之目擊者今分別緩急
因勢利導俾田畝資其灌溉水漲不受淹浸所言頗
合朕意但向來地方各官州縣局守一隅不能通盤
籌畫而大吏又因循草率憚於動帑興工每致臨時

竭蹶節節補苴迄無成效今會全局而熟籌之綢繆
於先事其中改紆為直移遠為近濬淺為深所奏應
疏應修各工具有條理不必更行交議著照所請交
與尹繼善白鍾山普福等會同嵇璜於應動工時次
第興舉所需帑項照例分別動支該督等其董率屬
員悉心辦理俾下河民生永有裨益

又

諭曰今日召見陳弘謀詢及各省水災據云皆因上游

為衆水所匯而下游無所歸宿必當會同通盤籌畫
方為有益其言頗中肯綮江南山東河南壤地相接
數年以來頻罹水患而今年為最朕早見及此於閱
河時即已諄切訓諭并分命欽差及督撫河臣相度
籌辦而時已首夏不及措施竣事者荆山橋上下百
餘里及清河積水而已豫兗之境則被災之地較廣
人戶田廬撫卹者不下數十州縣南望為之惄然傷
懷轉瞬秋冬正工作可施之候若不先事而亟圖之

徒坐視其年復一年橫流四出直至臨時張皇補苴
何所底止耶山東之水滙於淮徐河南之水達於鳳
潁該督撫等雖各守封疆要不得各分畛域況此噉
噉災黎皆朕赤子大臣公忠體國之謂何而忍稍存
分別見乎在今日言之會三省之全局而川澮以疏
之隄防以禦之工費誠屬浩繁然一舉而使千百里
之田疇民舍可以永獲安全則生民之利孰大於是
即多需帑金所不當惜況統屢年賑卹所用計之為

數果孰多孰寡耶在國家蠲賑未嘗不動盈數百巨萬而小民已先受蕩折之苦即使為督撫者皆能體朕愛民之心郡縣之吏又悉良有司撫卹極其周經理極其善而災黎所得日纔以升合計度命而已何如無災而得中歲蓋藏稍裕之為自能樂其生耶且水非旱比赤地千里待澤

上蒼非人力所及有吁嗟籲禱而已水則治之專藉人工所難者治之當得要領及任事當求忠實勇往之大

臣耳前曾以此諭尹繼善伊於地方情形非不熟悉
惟恐辦之或無成效動曰地處窪下而治之亦不能
保其不被水患夫治之而仍受水患此自未得治之
之道耳豈終不可治耶乃以是藉口而委之不治是
正因噎而廢食矣江蘇巡撫陳弘謀安徽巡撫高晉
山東巡撫鶴年河南巡撫胡寶瑤皆能任事之大臣
所有三省積年被水之由應如何相度形勢從長計
議俾可永弭水患之處著該撫等各於所屬境內悉

心查勘仍復彼此會同詳籌妥辦侍郎裘曰修夢麟
往來查閱隨時商酌其有應會兩總河者亦著會閱
詳議諸臣膺茲委寄務各矢實心和衷共濟以慰朕
念切民瘼宵旰憂勞之至意

又

諭豫省之衛輝等府屬被水田畝見據侍郎裘曰修奏
令地方官督率民夫開挖淤沙引入大河其距河遠
者即於原有坡河就近開通俾田水有所歸以期普

金匱要略卷八
行涸出不誤春麥等語疏濬溝塍原係民間自理之事但該處當被災之餘民力殊堪軫惻著通飭各屬於派撥民夫每日按名量給飯錢亦屬寓賑於工之意該部即遵諭行

又

諭尹繼善奏酌籌沛縣疏洩事宜一摺內稱山東湖口閘與韓莊閘相近雖為蓄水濟運實亦洩水尾閘而該閘僅寬丈餘不足宣洩又沂河自北而南流入駱

馬湖近因水大於邳州之盧口向西散漫入運與荆
山橋洩下之水相阻以致不能通暢皆為沛縣受病
之由此言頗中近日形勢而沂水不使入運尤為切
要蓋諸湖向以濟運而邇年運河之水不患其少惟
患其多良由橫決之水散漫入湖以致湖不能容溢
而入運運益不能容併為巨浸運艘阻滯旁邑為災
皆緣於此不可不急為籌辦其應如何設法堵築使
沂水各歸駱馬湖及湖口一閘應如何添建滾壩俾

得暢為宣洩而不致橫流微山入運之處著該督等
通盤詳加勘閱繪圖具議以聞

又

諭江南督臣所勘水利各工速行興修時尹繼善言南
陽昭陽微山等湖宣洩之路有二一由荊山橋至
王母山入運一由山東湖口閘入運請於湖口閘
添設滾壩及河清河定河成三閘越河俱挑寬五
尺使湖水得以宣洩又請堵築王家溝草壩口門

使駱馬湖水不得由此入運疏入

諭曰尹繼善奏稱湖口閘應添滾壩及河清河定河成
三閘應挑越河各工見已咨商白鍾山張師載等次
第籌辦等語所奏并圖中所指工段於該處情形頗
中肯綮惟是近年受惠全因湖流宣洩未暢所有關
係宣洩機宜既經查勘明確該督即當會同欽差及
河督等速行相度興工蓋此數百里中久遭汎濫災
黎待拯刻不可緩雖籌畫不厭精詳而興修不容濡

滯咨商往返坐耽時日轉不免築室道謀圖中應舉
工程甚多轉瞬冬令必須乘此時動工庶可於歲前
竣事稍或遲延則明年春水方生又妨工作且該處
民田久被淹浸無西成可望更無慮傷及秋禾亦復
何所瞻顧而不亟亟為之耶著裘曰修夢麟尹繼善
白鍾山嵇璜張師載及各該撫等凡有先後勘明各
工權其輕重緩急就中最要者速即同時並舉餘亦
次第興修均於歲內告成以收實效總之各工早竣

一日則水患早弭一日諸臣其同心協力奮勉趨事以副朕奠安民生至意尹繼善等又言沂河源出山東至邳州盧口地方正流由駱馬湖入六塘河旁流由盧口壩入運緣舊壩口門寬至八十丈年久刷深旁流過多有礙運河宣洩但沂水來源甚大若遽行堵閉不但暴漲之時全注六塘為挑宿清沫之患倘遇運河水小之年亦無以接濟擬將石壩口門祇留三十丈壩底填碎石以為節制使沂

水大半歸湖仍留二三分濟運至目下運河之水
惟患其壅滯無需接濟應於廬口築草壩堵截使
沂水不得涓滴入運又六塘河處駱馬湖下游為
宣洩沂水之要道應加挑浚其入海之武障義澤
東門白蜆牛墩六里等河間有淺阻俱應挑治并
請開小冲河五圖河俾下游多增入海之路俱從
之

又

論表曰修高晉等奏會勘宿靈虹積水情形籌辦疏浚
事宜一摺於水勢之來源去路頗為明晰所言歷年
受病之由及目前利導之法已俱得其要領見奏疏
浚各工應興舉者即行興舉不必會商往返致稽時
日朕為百姓生計並不惜費惟期用之於實永遠消
患而已至毛城舖為濰河上游欲濰河之無淤墊計
惟有堅閉毛城舖苟非盛漲不得開放萬不得已如
今歲之自行漫溢即當於斷流之後將淤沙盡力挑

浚若少因循則今年淤一尺明年即淤二尺河身墊
高節節阻礙年復一年其淤更甚故逐年挑濬深通
是為要務其濰河下游皆達於洪澤湖而洪澤湖以
清口為出路前經指授河臣於汛前將草壩拆卸俾
得暢流已有成效嗣後即以此為法不待盛漲一遇
水勢長發隨時酌量拆卸草壩預為減水之地從前
惟恐運河水少故須蓄以濟運今則惟患其多所當
因時審度不可執一而論也所有見議應開支河赶

辦竣工去累年淤阻泛濫之患不特宿靈虹等州縣漸有起色上游豫東諸積水皆有所歸民生利賴所關甚鉅諸臣其共勉之時袁曰修等言宿靈虹諸州縣被水之田緣豫省商虞夏永四邑之水畢匯於宿州所恃以宣洩者惟濉河一道而濉河自徐淮口至符離集七十餘里因上年毛城舖諸閘減洩黃水太多沙淤平岸河形全失濉河既不能容納則豫省諸水及宿州諸山水散流漫衍遂於徐淮

口南北分為二股南一股自張家溝至豬羊山冲
斷驛路下至時村由唐溝歸入濰河北一股自牛
家樓至大頭山高里壩於時村迤下三村歸入濰
河臣等議濰河上段已成平陸難以施工擬即就
兩旁冲出之河形因勢利導分一河為兩河至符
離以下仍入於舊河俾上游散漫之水得以順軌
分流自符離至靈壁之霸王城百數十里河身亦
間有淤墊應加挑深通以暢去路至霸王城以下

為靈壁之五湖從前楊疇土山陵子崔家孟山五湖原各為一湖今則連而為一其地最窪即多開溝渠亦屬無益不若捐之於水以為儲蓄之道其水沈地糧題請豁除至虹縣之板橋各小河口則濉河之入五湖者至此復露河形分為二支一由謝家溝經古汴河一由烏鴉嶺經歸仁閘下安河俱入於洪澤湖此兩支亦宜開浚以免阻礙其他支河之在宿州者有彭家溝濳河栢山河在靈壁

卷八
者有斗溝拖尾河沱河在虹縣者有荀家溝岳家河皆須挑浚以暢分流之勢虹縣又有潼河年久淤塞宜改從潘家山南達於董家溝較為徑捷此三州縣應修之水道也惟是下游之下復有下游洪澤一湖以清口為去路前蒙

聖明指示河臣將草壩拆卸以暢其流若每歲皆應期開放俾上游之水隨來隨去則來者雖多而去者能速不致壅閼於一時矣巡撫高晉又請浚治潁

州府屬之兩河口急三道河茨河明河淝河武家
河宋湯河鳳陽府屬之栢家河喬溝河黑濠河濕
泥河俱報可

令疏浚河南幹支各河裘曰修胡寶瑤等言豫省
自蒙澤以下北阻大河南則連山橫亘諸水所經
惟以正東及東南兩面為去路正東則江南宿州
之濉河向因徐溪口等處梗塞以致豫省之巴河
响河豐樂河皆無出路下阻則上淤此商虞夏永

四邑被水之由也東南則以江南潁州府之阜陽
太和毫諸州縣為出路淮水之大本能宣洩而兩
省犬牙相錯之處淺阻亦多豫省之水濡滯而不
下則豫省受其患繼之則極漲而潰奔流四溢其
患又且及於上江此開封陳州迤下及於歸德之
柘城鹿邑汝寧迤下及於西平下蔡水患之由也
今濰河已奉

旨興挑而潁毫一帶亦且次第疏導則去路可以無阻

夫而後水之在中州者可得而治也豫省東面之
幹河在商邱則為豐樂河在夏邑則為响河在永
城則為巴溝實即一河而旁受惠民溝陸鄰溝毛
家河虬龍溝岐河諸水河身既窄深不過四五尺
亟宜大加挑治東南一面之幹河以大沙河為大
即古之潁水見在深通毋庸疏治其他則賈魯河
歷祥符尉氏扶溝西華淮寧五縣入於大沙河自
尉氏以下宜加挑濬又有惠濟河在開歸陳三府

之中分賈魯河之水以達於淮向皆淤阻宜通身
浚治又有渦河經通許太康柘城鹿邑諸縣入亳
州界以達於淮下游淤阻自鹿邑以上漫口甚多
亦當挑濬此外如永城之漕溝夏邑之毛家河小
引溝觀音閣引河白河三汊河虞城之惠民溝商
水之北沙河大澗溝鹿邑之清水河汝寧府之洪
河汝河均有間段窄淺之處亦宜遍加疏濬如此
由引河以達於支河由支河以達於幹河其不能

歸河者或於田間多作溝渠以為導引或窪地聽為藪澤以資停蓄總使有源之水既得下注而潢汙野潦亦有所約束而不至於散溢則水道治矣
疏入得

旨報可

浚山東之伊家河從巡撫鶴年等議以洩微山湖之水使由梁王城入運也又裘曰修等請挑兗州之府河洸河及改金口閘涵洞為減水閘改楊家

壩為石閘俱從之

又

諭嵇璜奏高郵運河東隄添建石壩已竣并請酌定水
則如上游五壩過水漸多車邏南關二壩過水至三
尺五寸開放五里中壩若車邏南關二壩過水至五
尺再開放新建石閘視水勢之大小以為啟閉自無
壅潰之虞此所見深得蓄洩機宜蓋湖河水勢以五
壩為來源以江海為去路而歸江之路近於歸海况

下河一帶地本卑窪必視歸江諸閘壩實有宣洩不及之勢始可以次啟放今春南巡時親臨指示令將車邏南關二壩常行開放俾湖河得以隨時減洩而又早關歸江之路以達其流下河田畝遂獲豐收此已試之明效自當酌定水則以時啟閉著照嵇璜所奏過水尺寸立誌壩旁以垂久遠嵇璜又言高郵南關車邏二壩下引河應切去灘嘴俾過水順暢不致漫溢民田高郵之官河南澄子河北澄子河均

有淺阻應挑濬以導兩壩之去路再寶應湖下之
小新河廟基港蔣家壩下之金釵澗高郵湖下之
越河王家港俱應疏挑深通庶冬春水小之時得
以遞相灌輸騰空湖面以多留山盱五壩過水之
地

諭速為之

二十三年浚芒稻閘越河尹繼善等言芒稻閘為
湖河歸江最要之尾閘宜常行啟放使湖水分洩

於冬春水落時早為騰空以備伏秋容納之地但
芒稻河乃鹽艘必由之路若徹底啟放則礙鹽運
查鹽艘向由芒稻閘出灣頭河今改由芒稻閘迤
東越河直走金灣北閘則洩水與運鹽分為兩途
實於水利有益惟越河水勢淤淺應再挑深五六
尺并請將金灣北閘底改低二尺四寸以利輓運
從之

又

論豫東黃河大隄相隔二三十里河寬隄遠不與水爭
乃民間租種灘地惟恐水漫被淹止圖一時之利增
築私埝以致河身漸逼一遇汎水長發易於衝潰滙
注隄根即成險工不知隄內之地非隄外之田可比
原應讓之於水者地方官因循積習不加查察名曰
愛民所謂因噎而廢食者也著河南山東巡撫飭該
地方官曉以利害嚴行查禁俾小民知所顧忌不許
再加培築

又

諭夢麟奏微山湖水漸次疏通其湖口洩入荆山橋河
所有分引支河三道近來疏通已暢是以湖底漸涸
出路亦漸遠隨經接挑引河三百餘丈源源導引見
在湖流自不致壅滯但將來非得專員查看隨涸隨
挑恐日久又成淤墊著傳諭尹繼善白鍾山等派道
員專司其事不時查勘如有水涸沙屯即陸續挑挖
俾永遠疏通足資宣洩毋使已成之功復致堙塞也

又

諭尹繼善奏查勘宿桃等屬工程情形摺內有將駱馬湖尾閘商之河臣早行開放使湖面騰空以待汎水之語此湖河第一緊要之務也湖雖所以潴衆水而不為之及時宣洩則停蓄既多鮮有不致漫溢者向來治河諸臣不思達其去路而惟恃湖隄以相捍禦及湖漲難容終至泛溢不收而遠近田廬胥受其害矣駱馬湖之水由六塘河下洩而東流入海其河之

兩岸則宿桃安青海朮六州縣田廬在焉伏秋大汛
民生攸繫若使湖面早為騰空則汎水之來有所容
納盈科後進源源下注湖水無泛漲之虞而六塘河
兩岸亦斷不致潰決四出矣宣惟此六州縣之利其
潁河一帶運道民生亦咸奏安瀾之慶尹繼善既已
商之河臣早為開放尾閘以為預騰湖面之計應如
所奏速行此後每歲大汛之前應行開放時著總河
會同該督先期奏聞以免因循觀望并將此旨勒石

湖濱俾後之司河務者永遠遵守焉

又

諭陳弘謀所奏籌辦溝洫圩園情形已於摺內批諭矣
淮揚各屬水利見經相度挑浚大工告竣其溝洫圩
園乃係隨時葺治裨益農田之事雖當悉心經畫然
須次第從事若以意在保護民田而與水爭地轉
貽日後之患此又不可不為顧慮者所謂修廢舉墜亦
當隨宜籌度者此也如高寶海州等處從前舊有圩

田自應隨時酌量修理以資生計若所云湖蕩可為
圩田遽欲勸導興築恐此等窪下之區原皆留以瀦
水今若任民圍田設遇水勢盛旺不溢而為上游之
患即漫圩而過冲潰必多又安在其為利民耶雖謂
附近居民原所樂從並非強令興舉但小民惟知占
地之近利豈能深計全局況今年甫獲豐收民力未
甚寬裕地方官正宜體恤未便槩責以力從趨事此
於數郡民生甚有關係其實在情形非詳加體勘難

以懸定著交與尹繼善會同該撫再行悉心查看酌
議奏聞請旨尹繼善等議言溝洫圩圍之工原以資
蓄洩備旱潦但若任民圍築阻礙水道必為上游
之患臣等遵

旨督率各屬因地制宜或開溝以洩水或築圩以衛田
舊圩之殘缺者補之舊溝之淤塞者疏之凡低窪
湖蕩仍留為潴水之區不許圍築其通湖蕩之水
路並令酌量留寬寧讓地與水不與水爭利各處

挑浚溝洫務與新浚之河道脈絡灌注新舊圩溝
各別緩急以三年內全完庶民力舒徐而積歎之
區元氣可以漸復從之

皇朝文獻通考卷八

欽定四庫全書

皇朝文獻通考卷九

田賦考

九

水利田

乾隆二十四年濬山東曹單二縣江南豐沛二縣
之順堤河山東巡撫阿爾泰言曹單二縣境內之
順堤河上承直隸河南之水東注江南之豐沛二
縣入微山湖收蓄濟運因年久未挑間段淤塞臣

先經咨會江省督撫諸臣商辦務使江省與東省
河身一律寬深庶直豫之水不致灌聚曹屬尋據
兩江總督尹繼善言豐沛二縣順堤河東省上游
現在興挑下游入湖之路自應一併挑濬深通不
特濟運有資而順堤一帶田間坡水亦得藉以宣
洩實與運道民田均有裨益俱從之

開常熟昭文二縣白茆河徐六涇海口移建石閘
挑濬入海淤河兩江總督尹繼善等言蘇州府常

熟昭文二縣東北濱海向有海口二十餘處其最大者如白茆河徐六涇為太湖及境內諸水歸海尾閘乾隆十九年為防海潮築土塘一百十餘里止留小口數處可以通潮餘皆築壩堵塞數年間塘外通海之河淤成平陸內水漲發塘寬壩厚臨時難開以致太湖所洩東來之水壅積不行自常熟昭文及上游各縣田疇均受其患臣等相度形勢白茆河徐六涇二口亟宜開通而海潮亦須防

護查上游舊有石閘二座自築土塘已成無用應移
於開壩之處用板啟閉以資蓄洩其塘外淤河挑
濬深通直達於海則尾閘通暢鮮有積水為患矣
疏入得

旨允行

又

諭現在甘霖未沛京師各處河渠若加修濬深通水土
之氣庶可條暢通達且無業貧黎畚鍤將事亦可得

催植以資口食所有護城河渠圓明園一帶應修河渠著鳩工開濬

准修建浙江海塘柴石各工程浙江巡撫莊有恭言海寧仁和二縣石塘自康熙五十四年後陸續改建已無復可加之工惟老鹽倉一帶柴塘四千二百餘丈當年亦曾議建石工以活水浮沙難施椿石而止現在江溜海潮因中小鹽之下口門沙漲連接水勢北趨其北大鹽河莊山後已冲開港

道大溜由中北二疊水半分流則老鹽倉迤西之
華家街翁家埠等處正在河莊峯之緊對北岸雖
塘外老沙尚未坍動設遇江流迅發秋潮盛滿不
能保無進臨塘脚之虞查柴塘停修已十餘年現
多姓蟄柴底自必霉朽應於富陽建德桐廬分水
四縣採辦柴料俟秋汛過後審量河勢有無坍逼
塘身應否拆修分別緩急辦理又海寧城外附塘
土堰共長三千三百餘丈應於現存姓蟄舊土之

上加高三尺以六尺為準於舊堰底幫寬二尺以
一大四尺為準再新舊石塘全賴層石坦水保護
塘根今北趨方始而護河已日見坍卸應俟大汛
過後相度情形如有逼溜頂冲處所查若未建坦
水另行添建如舊有坦水或因年久椿朽石欹亦
即勘實修補疏入部議令大汛經臨即查勘確實
情形及時辦理得

旨依議即行

令濬衛河泉源河東總河張師載等言衛河之水
全賴泉源而山水性猛動挾泥沙退即淤墊應於
春季水生時凡有泉眼壅塞河身淤墊及豐草盤
結有礙泉流之處即飭地方官督率民夫上緊挑
濬芟夷自可收濟運利民之實益從之

二十五年

諭據張師載高晉陳弘謀等前後摺奏俱稱五月中雨
水較多各河水勢疊次加長旋即消退工程俱屬平

穩此皆前年籌辦河工水利時經朕特派大臣會同各該督撫悉心相度不惜帑項疏濬得宜是以河道俱極深通雖水勢驟長而消退甚速可見事苟善籌效必旋至為其事而無其功者未之有也然此等工程創之於一旦甚難隳之於日久甚易此時盛漲後各河之淤墊必多若不隨時撈濬勢必漸成淺阻與其修挑於甚淤之後費大而人勞何如修挑於未淤之前事半功倍著各該督撫一俟水退即行查察

淤淺處所一律挑濬仍不時相機籌辦俾河道長得
深通水勢永無泛溢用副朕乂安生民至意

准將南關車邏等壩封土三尺尹繼善等言高寶
興泰下河被水之由皆由南關車邏等壩並無限
制故洪湖水長不及歸江歸海先後各壩滾入下
河其勢甚順乾隆十八年臣等曾經奏明將南關
車邏等壩封土三尺伏秋水漲次第開放二十二
年又經改議不必封土任其過水意謂以漸而去

下河可以容受但一遇水勢長發下河即易受淹
臣等再四籌思欲使下河減災惟有節其來水請
將南關車邏等壩仍封土三尺俟水勢長至三尺
以外方許啟壩如在三尺以內嚴謹防守不得擅
啟俾湖河之水專注歸江則下河可獲豐收實於
補偏救弊大有裨益從之

開運河東堤金灣壩下引河改低董家溝等三壩
禮部尚書嵇璜言運河東堤之金灣滾壩上承諸

湖之水為歸江要道今口門寬四十丈而尾閘仍歸入六閘河內未能暢注應請於壩下開挑引河一道俾減下之水由董家溝直捷注江則尾閘更為寬暢又查董家溝廖家溝石羊溝三壩壩面尚高應改低三尺以芒稻西閘為準使就下之水益加暢利奉

旨交尹繼善等勘議尋據尹繼善等議應如所請并請於壩北展寬十丈以順其吸川建瓴之勢又西灣

壩下引河應取直加挑鳳凰橋引河亦應挑濬寬濶董家溝廖家溝石羊溝三壩壩面並應展寬壩下引河酌量挑濬從之

准改常熟昭文二縣海口石閘為壩江蘓巡撫陳弘謀言白茆河徐六涇為常熟昭文二縣洩水最大之海口向為土塘築斷乾隆二十四年臣會同督臣尹繼善奏請開通將附近舊閘二座移建塘口隨時啟閉奉

旨允行年來田禾均得有收已有成效因今年夏間潮大異常又值靈雨以致閘口沖激欹斜其建閘之處又係沙土即再增閘口亦難經久不如改閘口為滾壩將土塘缺口用石鑲砌壩底另鋪石盤其壩底高低以酌量內地需水之分為度不需啟閉內蓄外洩旱澇益覺有備從之

二十六年准於易州原泉村開渠建壩以資灌溉直隸總督方觀承言易州城西原泉村向有泉一

道由村南行入於沙灘即伏而不見從前曾在沙
灘北築壩鑿渠引水東注中貫廠城以達於州環
城為濠由西南放歸易水居民鑿子渠支分派引
約可溉田二百餘頃迨後壩毀渠塞泉仍滲入沙
灘應重建石壩一座隔截沙灘別開新渠一道長
一百一十八丈導入舊渠由廠城以達城濠又木
槽村及廠城西南乾河溝二道應各築小石壩攔
截俾無旁洩如此則水到之處田疇蔬圃均資利

澤而繞城深池亦符體制其各子渠聽民自行挑挖官為督率辦理疏入得

旨報可至二十八年渠成

賜名安河

濬常熟縣之福山塘河陳弘謀言常熟縣福山塘河潦則積水由此河歸海旱則引海水入河分資灌溉千萬頃農田水利所關又為商賈入口之要道祇因海潮帶沙常有淤積應及時挑濬得

旨允行至三十一年十月巡撫明德言福山塘河自開
浚後農田大有裨益迄今五載海潮冲擊河身復
淤宜乘時再行挑濬從之

疏通良鄉縣水道方觀承言良鄉縣逼近西山西
高東下每逢大雨山水漲發東注之水去路遏塞
往往為患田廬阻隔行旅查縣之雅河廣陽牯牛
琉璃等河本足以資宣洩因其間舊有溝渠淤塞
不能轉輸應按其地勢隨宜疏引使之節節流通

各有歸宿從之

開泰州阜寧鹽城縣之各閘引河歸海河道總督
高晉等言揚州府屬高寶興泰等下河地方積年
被淹蒙

恩准將南關車邏等壩封土三尺又加挑金灣壩下引
河分流歸江自此湖河之水不致漫過三壩而免
西來水患惟是各州縣境內支河汊港及田間積
水向來俱匯入串場河北流二百餘里始行歸海

道遠迂迴驟難消涸臣等相度形勢籌其去路請
將泰州之丁溪小海二閘引河疏濬深通順勢再
開一引河匯入王家港歸海又將阜寧鹽城二縣
境內之上岡草堰陳家沖三閘各引河疏濬深通
順勢亦開一引河匯入射陽湖歸海裁灣取直順
勢安流則積水可以早消沮洳漸成沃壤矣從之

二十七年

諭朕稽典時巡念海塘為越中第一保障比歲潮勢漸

趙北大壘寶閣海寧錢塘諸邑利害計於老鹽倉一
帶柴塘改建石工即多費帑金為民間永永禦災捍
患良所弗惜朕抵浙次日簡從臨勘則柴塘沙性濫
汕一捲甫下始多扞格卒復動搖石工斷難措手所
以為吾民善後者惟有力繕柴塘得補偏救弊之一
策地方大吏其明體朕意悉心經理定歲修以固塘
根增坦水石簣以資擁護庶幾盡人事而荷神庥是
朕所宵旰厘懷不能刻置者督撫等可將此旨於工

次勒石一通永誌遵守

又

諭尖山塔山之間舊有石壩朕今親臨閱視見其橫截海中直逼大溜猶河工之挑水大壩實海塘扼要關鍵波濤衝激保護匪易但就目下形勢而論或用竹簍加鑲或改用木櫃排砌宜隨時經理加意修防如將來沙漲漸遠即宜改築條石壩工俾屹然成砥柱之勢庶於北岸海塘永資保障該督撫等其善體朕

意於可興工時一面奏聞一面動帑僦辦并勒石塔
山以誌永久

准修築直隸濱河堤堰挑濬停淤水道以工代賑
方觀承言直屬上秋雨水過多河淀交漲各處濱
河堤堰多被冲刷亟需加培完補而河渠水過濇
淤亦應挑濬查文安大成等七州縣之千里長堤
固安霸州等五州縣之牝牛河並霸州之中亭河
六郎堤雄縣之清河高陽蠡縣之豬龍河河間府

屬之羊河天津海河西沽盧北口等處疊道南運
堤堰並青滄二減河吳橋東光等五州縣之宣惠
河河間天津二府屬分疏瀝水入子牙南運之各
支流河冀州衡水等處之滹沱會流河望都新安
等處長渠一切應濬應築各工均屬上年被水之
地仰懇

天恩准照興工代賑之例每土一方給米一升鹽菜錢
八文俾貧民咸得赴工食力而各處水道河防並

獲疏通鞏固實多裨益從之

命大學士劉統勳等查勘湖河歸江應辦事宜劉統勳等議言臣等查勘湖河歸江之路自邵伯以下向設有灣頭閘等七處宣洩湖水由鹽河歸廖家溝石羊溝董家溝芒稻閘四河分流下注內如灣頭閘壁虎橋鳳凰橋河身寬展足資分洩惟金灣滾壩新挑引河尚覺未能暢遂又金灣六閘舊有鹽河由芒稻閘歸江該處六閘金門僅寬十丈八尺

未免來源過窄又東灣滾壩先於乾隆二十二年
落低三尺西灣滾壩未能並落臣等酌議將金灣
壩新挑引河量為展寬以河底十丈為率下游地
勢稍仰亦應一律挑濬深通使有建瓴之勢六閘
鹽河向設南中北各二閘北閘二門為運鹽要津
應仍留以利鹽運自中間迤南拆去二閘添建石
壩三十丈其閘下土堤接築加長酌挑引渠以順
水勢西灣滾壩照東灣一體落低三尺并於西灣

河頭酌挑寬深以導引水勢則高寶諸河歸江之路益暢實於下河民田廬舍大有裨益疏入得

旨報可

又

諭江南瀕臨河湖沮洳之區南則高寶甘泉北則宿清海沐最稱窪下每遇伏秋大汛霖潦堪虞而下游蓄洩機宜惟洪澤一湖尤為橐籥關鍵朕早作夜思為澤國民生求保障安全之計非親巡規畫難定折衷

昨駐蹕蘇城先命大學士劉統勲協辦大學士兆惠
會同督河臣將歸江歸海各路詳勘標誌朕回鑾取
道按閱講求指示其在高寶一帶應宣導歸江者自
邵伯以下如灣頭閘等處足資分洩惟金灣滾壩新
挑引河未能暢達應再為展寬以河底十丈為率下游
地勢稍仰並一律挑濬深通俾成建瓴之勢又東灣
壩前已落低三尺西灣壩尚仍其舊諸臣議請一體
落低三尺朕量該處洩水情形至為便捷應將西灣

壩再落低一尺共低四尺則平日已有尺水入江庶
可預減暴漲之勢其河頭亦加挑寬深以資利導金
灣六閘應折去中二閘添建石壩按築土堤並量挑
引渠以備盛漲湖水自無閘壅之患然此節節措置
特為三湖旁疏曲引起見耳若其湖原掣要為釜底
抽薪之策則莫如廣疏清口乃為及今第一義現在
測驗洪湖高堰五壩高於水面七尺及七尺五寸不
等清口口門現寬二十丈當即以此酌定成算將來

俟兩壩之水如再增長三尺清口不必議寬設至四尺即將清口拆寬一大湖水以次遞長則清口以次遞寬總以上壩增一尺之水下口開十丈之門為準過秋汛逐漸收至二十丈或十數丈則全湖勢暢以視求助於分支別派者其功奚啻倍蓰至駱馬湖水由永濟橋東注為六塘河源流既遠所受支河甚多河中淤埂阻滯溜勢一過暴漲猝難容洩田廬易致漫淹應視兩岸中間窄狹者再加寬展切去河中

淤埂俾游波寬緩不至出槽堤身殘薄者量為修補
以資捍衛其六塘河尾閘橫經鹽河由東岸武障等
河下洩入海原設條石滾壩為過水之準其旁並設
草壩水小則蓄水運鹽水漲則拆壩消水商民彼此
各爭其便當每年權其緩急利害立定限制以時啟
閉地方大吏其善體朕意實力奉行所有一切各工
該督撫河臣會同鹽政悉心確估核議以聞

又

諭直屬被水窪地此時已屆冬令非設法疏通洄出何以無悞春耕目下稍事因循一遇沍寒便已難施畚鍤於民生關係甚重著方觀承趁此天氣融和悉心及早籌度於沮洳附近之土多方挑挖溝濠俾積水不致稍淤而赴工貧民兼可藉以餬口實為一舉兩得可即一面詳悉具奏一面乘時妥辦

又

諭直省督撫辦理溝渠蓄洩事宜山東道御史湯世昌

言今歲近京各處雨水過多低田淹損行路泥濘
頗為農商之病惟於大道兩旁開渠深廣旱澇蓄
洩該地農民照河工民堰民修之例富者計畝出
夫貧者出力餬口因其地勢節節疏通則水有歸
宿農商不至受病矣疏入工部議如所請奉

諭旨工部議覆御史湯世昌條奏廣開溝渠以資蓄洩
一摺所辦尚未洞悉自古力役一項本為捍衛民生
並非征求無藝第如摺內所稱富者計畝出夫貧者

出力餬口微特小民久樂昇平不識公廩之令設使
地方不肖吏胥因而從中高下其手苛派賄脫轉非
因利利民之意自宜分晰籌畫如其地與民田民舍
甚為切近而工程又屬細微民間願出力從事者聽
其自行修築不必繩以官法外若其功非旦夕可既
而民力更難以全任則仍當官為酌助口食之資庶
民不艱而事易集是在封疆大吏飭屬善為之耳

建復南昌縣富倉圩石閘江西巡撫湯聘言南昌

縣屬之富倉圩地處極低該圩中間有民田萬一千餘畝四面受水舊有土堤石閘以資捍禦今年久頃圯宜於北堤小港以下琵琶洲以西建復石閘一座乘此農隙水涸之時趕緊興築其土堤小閘聽民自經理官為督率實於該處民田大有裨益從之

濬烏程長興二縣境內淩港閘浙總督楊廷璋言湖郡之水由七十二淩洩入太湖出蘇州之寶帶

橋歸吳淞口入海其淩隸烏程者三十六隸長興者三十四港內淤墊港口復為蘆葦壅塞以致秋雨過多山水驟發便至淹浸應開寬濬淤以分水勢而護民田俾水道暢流歸湖迅速自不至有淹浸之患從之

二十八年淮濬鳳河上游以工代賑方觀承言鳳河發源

南苑出回城門閘子口經大興東安通州武清天津

各地方入大清河其自武清之南宮村以下現在
深通南宮村以上至閘子口一百二十餘里內間
段淤淺兼有河身過窄之處雖泉河本水尚資容
納而兩岸漚水淹浸田禾即不能資其宣導今逐
段查勘應將淺處挑深窄處挑寬照現在工賑之
例辦理從之

又

諭畿輔一帶去年秋霖過多窪下之區現在設法消疏

以利東作因思海河為積水委輸之尾閭而地方官
或拘於成例僅將五閘宣洩不肯推廣籌辦多開壩
口以為釜底抽薪善策著協辦大學士兆惠馳驛前
往會同鹽政達色知府周元理悉心確勘情形有應
行增開之口一面奏聞一面辦理務期去路疏暢水
消之後補築口門即不無所費而利民實多不必稍
為瞻徇也兆惠言津城宣洩大勢水在運河東南者
以海河為尾閭今積水俱在東南必視海河長落

為利導臣等查看情形於舊設五閘口測量海水
高下大抵閘內之水高於海河五七八寸不等
其中大閘口白塘閘均無庸加開其餘賀家口何
家園灰堆等三舊閘應量為開寬以資輸瀉至五
閘外地方官所開溝渠自雙港東南至鹽水沽五
溝須大加開寬以便流駛又賀家口東之陳唐莊
灰堆北岸之黃家莊並雙港西口及新莊等四處
俱可添開溝道通計自大閘口至鹽水沽五十里

新舊溝閘凡一十五處足資疏消約計四月初間
全境積水可以消退其現添新溝至海河水長即
須填塞舊存五閘夏月潮漲亦須堵閉疏入得

旨報可

濬治蘇州松江太倉等屬水道江蘓巡撫莊有恭言
太湖之水由三江歸海經流蘇松太所屬之吳江
震澤十二州縣境內查吳江之十八港十七橋吳
縣之貼魚口大缺口為湖水穿運入江要道不無

淺阻又入吳淞之龐山湖等處向稱寬濶邇來民間圖利遍植茭菱圈築魚蕩亦多所侵佔劉河情形大非昔比舟楫來往必艤舟待潮崑山外濠為婁江正道淺狹特甚蘇州之婁門外河為江源出運咽喉河面僅寬三四丈不等應自運河以西凡太湖出水之口就其有港可通有橋可洩之處為之清蘆佔塞務使分流迅速其運河以東吳淞江自龐山湖以下婁江自婁門以下凡有淺狹阻滯

處所疏濬寬深一切植蘆插蘄及冒佔水面之區
儘數剷除嚴為之禁疏入得

旨報可

准挑濬荆山橋舊河山東巡撫崔應階言東省濟
寧魚臺二州縣屢遭湖水淹浸本年復被偏災臣
於八月初旬查勘韓莊滾壩過水五尺至十二月
過水尚四尺一寸必須湖水與壩脊相平窪地方
可涸出今消落無期有妨耕種查南陽昭陽徵山

等湖水昔年原藉銅沛境內之茶城小梁山內化
山三河會入荆山橋河內王母山倪家溝彭家河
三處出水濟運自荆山橋淤墊以致湖水泛漲蒙
恩發帑開東省之伊家河添建韓莊滾壩又將江南荆
山橋河道疏濬深通衆水齊下濱湖窪地盡皆涸
出是荆山橋尤為全湖尾閘扼要今查勘銅沛一
帶如茶城小梁山內化山三處支河俱已淤淺下
游荆山橋河道間段淤阻橋設一百五十九洞僅

止數洞流通餘俱乾涸徵湖之水去路甚微仰懇
皇上天恩

勅下江南督撫將茶城小梁山內化山三處支河一律
挑濬使直達荆山橋其橋上下河道及出口入運
處凡間段淤淺者普加疏濬使湖水得以暢流東
省濱湖窪地固有裨益而江省銅沛二縣水淹地
畝亦可涸出矣疏入

諭崔應階奏請挑荆山橋舊河一摺所見甚是東省南

陽昭陽微山等湖匯為巨浸每遇水漲之時窪地常
遭淹浸濟寧魚臺二屬適當下游之衝田廬所關甚
重前曾特派欽差同地方大員辦理朕上次南巡復
經親臨閱視面諭河督諸臣隨宜設法籌辦但橋畔
河淤日增日積非大加興挑何以去沮洳而資利導
著派協辦大學士兆惠於明歲初春馳驛前往會同
尹繼善葉存仁崔應階相度會議熟籌妥辦至二十
九年尹繼善等言臣等遵

旨挑濬茶城等三處支河處處深通宣洩甚暢微湖之水日漸消落茶城小梁山兩處河頭過水漸減經臣高晉督令將茶城河頭接挑一百三十丈小梁山河頭一百六十丈臣親行查勘湖水較前又落數寸應再接挑茶城河頭七十丈小梁山五十丈并將河形淺窄之處加展寬深其內化山河頭舊有引渠二百一十丈亦屬淺窄應一併展寬仍不時留心查看俟湖灘再有消涸即行續挑務期得

尺進尺挑至湖深處為止俾湖水源源暢洩永資利賴從之

二十九年

諭高晉等辦雲梯關黃河下游一摺所見甚是已於摺內批諭雲梯關一帶為黃河入海尾間原不必設立堤岸與水爭地而無識者好徇浮言或以上流清口洩水分數較多遇海潮盛時或不免意存顧慮因有子堰堤防之議殊不知清口暢洩其收利在下河州

縣者不可數計至雲梯關附近不過阜寧安東二邑
所轄地面即令一時偶值盛漲所侵溢者不敵百分
一二高晉既知下游之制防一切毋庸置議益可信
清口之展放無難永遠力持於水利民生實為交有
裨益先是高晉言雲梯關下游北岸之五套南岸之陳家
浦近日溜勢趨逼漸次兇灣向裏舊有土堤卑矮
單薄據山海二廳請估幫高厚添接魚鱗越堤臣
親赴察勘雲梯關以外俱係蘆葦蕩地離海甚近

是以舊制本無堤岸因一望平灘水勢易於散浸
曾設卑矮土堤約欄水勢與關內堤工形勢迥別
自不應與水爭地臣等詳加相度與其築堤束水
致生新工不如讓地與水以順其性將來伏秋汎
內酌量情形預於舊堤上另作斜長子堰一道俾
漫灘之水攔入正河而清口東西壩每年大加拆
展湖水匯黃歸海尾閘寬濶於就下之勢益資暢
達矣疏入遂有是

諭

修築無為州圩田堤壩安徽巡撫託庸言安省沿江各屬圩田全賴堤壩捍衛本年夏間江潮盛漲漫缺甚多小民俱各自行修築惟無為一州地處極低被水獨重臣委員分勘大小缺口二百餘處州境內外堤壩二百餘里經江潮汕刷處處卑薄應及時修築完整以資捍禦從之

三十年

諭海寧石塘工程民生攸繫深厯朕懷連年潮汎安瀾
各工俱屬穩固茲入疆伊始即日就近親臨相度先
行閱視遶城石塘五百三十餘丈實為全城保障而
塘下坦水尤所以捍衛石塘但向來止建兩層今潮
勢似覺頂衝外沙漸有汕刷二層之外應須預籌保
護該撫等上年所奏如建三層坦水六十餘丈亦就
尤險要處而言於全城形勢尚未通盤籌畫若一律
普築三層石坦則於護堤保塘尤資裨益著將應建

之一百六十餘丈均即一例添建其二層舊坦內有
椿殘石缺者亦著查明補換該督撫等其董率所屬
悉心籌辦動帑興修務期工堅料足無濫無浮以收
實濟副朕為民先事預籌之至意

又

諭前因微山湖蓄水過多瀕湖窪地每致淹浸經崔應
階等奏請宣洩微湖以水誌一丈為度於韓莊添建
新閘以殺其勢並挑荆山橋以暢其流朕今歲南巡

回鑿時舟行所經詢知窪地近多涸出農田耕作有
資但湖水暢消亦恐艱於濟運今據楊錫紱奏稱湖
內之水須存一丈二尺用至五月八閘底水尚可
得四尺餘寸若止存一丈則五月間八閘底水止
存二尺六七寸重運難行請交東省河撫二臣可
否量改水誌或將湖口以下數十里河底一律挑
濬五尺等語所奏於漕渠轉輸自有裨益但水誌
改加二尺於低窪地畝有無妨礙及挑深河底是
否可行著崔應

階會同李宏詳悉確勘具奏期於漕運民田均得利
賴崔應階等議濟寧魚臺濱湖地勢高於滾壩無幾
如水消至一大方能耕種若將滾壩加高二尺不
免淹浸臣等議將滾壩內磯心每孔安砌石槽設
立板片如水小之年加板欄束多收一尺設水勢
日增即將板片起除及時暢洩至八閘河底多係
沙壘難於開鑿惟應將新經淤墊沙泥儘力估挑
務至舊時河底而止如此則小水之年滾壩之上

既經加水一尺河底又復挑深於漕臣增水二尺
之數儘可相符而濟寧魚臺民地亦不致有淹浸
之患矣疏入得

旨報可

開挑武進丹陽二縣之孟瀆等河尹繼善言常州
府屬之孟瀆德勝兩河南通運道北達大江關係
數邑水利民田萬頃咸資灌溉緣積年吐納江湖
流沙停積河身淤墊孟瀆河計長一萬五百餘丈

德勝河六千六百餘丈亟須築壩大加挑濬鎮江府丹陽縣之九曲河亦係通潮濟運灌溉田疇年久淤塞計長九千五百餘丈亦應行挑濬從之

三十一年

諭京畿內外河道溝渠前經動帑興工濬治今雖閱有年所物料或漸朽敝亦究因估辦之初未能核實所致是以每歲仍事補苴難以經久完善今據該管大臣等議覆御史戈濤請修街道溝渠條奏估需銀十

七萬餘兩此項程工關係緊要原不惜多發帑金以
為永遠利民之舉然非悉心籌辦實用實銷於事終
無所補現今估計大修非從前隨時修治者可比惟
在董辦大臣稽覈精詳毋致工程稍有偷漏庶從此
經途平坦溝道宣通足垂悠久

又

諭阿思哈奏嵩縣知縣康基淵開渠溉田著有成效批
司記功以示獎勵一摺州縣為親民之吏於地方農

田水利果能實心經理裨益民生實為吏治首務今該縣康基淵挑濬伊河兩旁古渠並山澗諸流可資引導者一律疏治深通溉田六萬二千餘頃洵屬崇尚實政留心民事之員僅予記功不足以示鼓勵著交部議敘但有司承辦此事務期誠心為民方足表循績而膺錄敘若因有此旨妄生冀倖遂爾粉飾沽名虛文塞責其或辦理不善紛擾更張則是名為興利而轉以滋累又不可不防其流弊惟在各督撫覈

實體察以為課最耳著將此通諭知之

三十二年

諭朕此次巡幸天津閱視淀河隄牘按圖披覽內有千
里長堤之三灘里起至格淀隄莊兒頭止並無隄岸
東西約長十餘里每當雨水過多之年村民一二千
戶地畝千餘頃常被水患村民未免向隅著交與方
觀承再行詳悉相度接築長隄即核實估計妥議具
奏

又

諭朕此次巡行河淀閱視隄防今由運河回鑾經筐兒港查看減河形勢見壩身出水處高於河底七尺則遇汛漲時所減之水下注過猛易致跌落成坑排椿不無撼動自應於石工之外接築灰工十五丈使坦坡漸平以導其勢至王家務捷地興濟三處減河皆所以宣洩盛漲保衛堤工則由一路入海不使三岔河之水滙積尤為畿南水利攸關亦宜一律疏濬留

淤期於深通易達再子牙河故道自谷家莊以下至吳家溝一帶河身窄狹並應普例展寬用消瀝水以衛民田所有各處工程著該督方觀承按工核實估計奏聞動帑興修務使疏洩得宜俾河務民生永資利賴副朕省方籌咨至意

三十四年

諭前經軍機大臣會同工部議覆范宜賓奏挑挖運河一摺以河工形勢不便懸擬請旨特派大臣於霜降

水涸後會同辦理今據吳嗣爵奏到現在回空糧艘
全出東境必須早為勘定庶可不悞挑工等語著派
大學士劉統勳侍郎德成馳驛前往會同吳嗣爵富
明安詳加履勘悉心籌畫據實核議奏聞妥協辦理
務期於河道運務俱有裨益

三十五年

諭據楊廷璋奏北運河張家王甫堤漫工甫經合龍因
連日大雨河水盛漲以致復有漫溢汕刷等語近日

直隸地方雨水過稠熱河古北口等處俱有被山水
冲刷民居鋪面之事今北運漫口復有汕刷之處所
有過水地方田廬間有損傷自應照例查辦至大城
文安一帶本屬窪下之區旁近地畝恐不無被淹之
處朕心深為軫念著傳諭楊廷璋即速遴委大員悉
心體勘如有被災戶民即行妥協撫綏其涸出之地
可以補種蕎麥者亦應酌借資本諭令及時趕種

又

命德成往永定河堵築漫口工程

三十六年

諭據高晉等奏七月初間汎勢更甚工程在在危險隨
開放王營減壩以洩黃漲而上游之桃源宿遷邳睢
豐碭各隄浸水滲水之處均無虞淹及民田廬舍等
語今年黃河秋汎復盛正切厯念高晉李宏能督率
員弁相機籌度搶護得宜現已漲消工固深為嘉慰
是年堵築桃源廳屬陳家道口工竣

三十七年

諭上年因永定河北運河等處遇夏秋水過多每不免於漫溢宜急籌修治宣洩之方現在春河冰泮正屆開工之期自應及時經理興作但此兩河應辦工段極為繁重所派承辦之員甚多動用錢糧亦大著尚書裘曰修前往協同周元理董率各員悉心伙助務使大工迅速告成永資恬鞏

又修汶上嘉祥濟寧魚臺等州縣湖堤民捻兼疏

通水道

諭衷曰修奏驗收永定河工程一摺併陳近水居民與水爭地之弊淀泊利在寬深其旁間有淤地不過水小時偶然涸出水至仍當讓之於水方足以暢蕩漾而資瀦畜非若江海沙洲東坍西漲聽民循例報墾者可比乃瀕水愚民惟貪淤地之肥潤佔墾效尤不知所佔之地日益增則蓄水之區日益減每遇潦漲水無所容甚至漫溢為患在閭閻獲利有限而於河

務關係非輕其利害大小較然可見著通諭各督撫
凡有此等瀕水地面除已墾者姑免追禁外嗣後務
須明切曉諭毋許復行佔耕違者治罪

周元理奏永定北運二河并淀河之千里長堤及
天津之格淀隄等處修築工竣

三十八年

諭今日閱視淀河內鷹嘴壩及鹿疇兩處應添引河工
程其鹿疇引河據周元理擬挑九百丈即如所擬行

至鷹嘴壩曲處該督擬開挑引河一百二十七丈仍
恐射堤灣處不能引流歸漕著向西北展長百十丈
則大堤不致受頂衝以資保障河防原以衛民惟期
盡善卽為費較多亦所不靳著周元理卽照指示機
宜動帑妥協辦理仍飭大員董率稽查務令工歸實
濟民資利賴

張家口上堡圍城修築東北兩面石壩被水沖圯
之處計一百六十餘丈於外添築護壩石坦坡四

百十二丈二尺

三十九年

諭江南黃河老壩口堤工漫溢現在高晉等集料剋期堵築併有旨令何燭於查勘潘家屯引黃入湖事畢順赴老壩口協同堵築以期迅速集事但此次漫缺堤工淹及板橋淮安一帶水勢較大運道民生甚有關係大學士舒赫德河工向為諳悉著即前往會同高晉等妥籌速辦以副朕懷

吳嗣爵薩載等奏外河廳屬老壩口漫溢堤工晝
夜儻趕鑲柴壓土立見斷流黃河大溜全由故道
歸海

四十一年工部議巡漕御史索興阿奏通惠河各
牘修理工程坐糧廳不能親身辦理又無屬員可
委請改歸通水道管理如議行

四十二年

諭朕從前屢次南巡閱視清黃交匯處悉其倒漾之患

因思若能引向陶莊以北而流則清口通暢庶免黃
流倒灌因未躬臨陶莊一帶閱視是以踟躕昨歲薩
載赴山東行在召見時諭令赴黃河海口上下察看
伊即奏請若於陶莊開挖引河一道使黃水繞北下
注清水益得暢行與朕意相合伊果能遵照指示剔
挑完竣可免黃河倒灌之虞並收清水刷沙之益即
就近險工亦俱化為平穩實為全河一大關鍵

四十三年工部議浙江仁和海寧等處修築柴塘

及竹簍魚鱗石塘坦水各工准動帑修理

諭高晉奏查時和驛漫口下注之水歷陳留杞縣睢州
柘城境內之黃河康家河南沙河老黃河均歸賈魯
新河下達江南亳州之渦河儀封漫口下注之水一
由考城之盤馬寺溝入北沙河至商邱縣之鄧濱口
由歸德府之陳兩沙河匯入渦河一由寧陵縣之馬
三河亦會歸德之陳兩沙河入渦河是豫省漫水均
以亳州之渦河為總匯如有停淤歸於歲修水利案

內一律疏濬等語所籌未為要善其疏濬工程斷不
宜照常籌辦復滋派累著高晉於祥符儀封合龍事
竣會同鄭大進閱鵝元沿途親行確勘將應挑之河
核實估計具摺奏聞候朕發帑興工

四十五年湖北巡撫鄭大進奏鍾祥潛江各堤潰
口攸關億萬田廬亟宜興築以資保衛鍾祥縣自
永興觀至保堤觀挽築月堤九百九十七丈又毀
家灣潰口淤沙盈積難於沙面築堤應挽築月堤

二百五十三丈潛江縣之長一垸地形窪下應自
地勢較高之董家壩至鎮龍山挽築月堤一千八
十六丈四尺零則襄水不致衝突矣從之

大學士公阿桂等會奏雲梯關外馬港河修復牖
壩疏入奉

諭旨所奏修復馬港河西堤殘缺之處及接築無堤處
所聯至北潮河西岸民堰以禦倒漾自應如此辦理
其二套以下由北潮河入海之處既係路捷勢順設

遇漫溢正可分洩盛漲俾尾閭益得暢達轉可不必
添建牐壩雲梯關以外原不必與水爭地今二套以
下既為分洩盛漲之區則馬港河堤東灘地即不能
保無漫溢其應徵減則地畝錢糧著交薩載等查明
奏請加恩豁免

又

諭海寧州石塘工程所以保衛沿海城郭田廬民生攸
繫從前四次親臨指受機宜築塘保護連年潮汎安

濶各工俱為穩固今朕閱視石塘惟統海寧城之魚
鱗石塘內有工二十餘丈外係條石作牆內填塊石
歷年久遠為潮汐衝刷底椿霉朽兼有裂縫蹲矧之
處又城東八里文將字號至陳文港密字號止有石
塘工七段約共長一百五六十丈地當險要塘身單
薄亦微有裂縫不可不預為籌辦著將兩處塘工均
改建魚鱗石塘并添建坦水以垂永久又石塘迤上
前經築有柴塘四千二百餘丈究不如石塘之鞏固

雖老鹽倉有不可下椿之處未必四千餘丈皆然朕
於民瘼所繫從不惜帑省工俾資保護著該督撫將
可以改建石塘之處逐段勘估奏聞辦理俾濱海羣
黎永享安恬之福以副朕先事預籌至意

又

諭朕巡幸浙江由海寧閱視塘工至杭州老鹽倉一帶
有柴塘四千二百餘丈雖因其處不可下椿為石塘
然柴塘究不如石塘之堅固業經降旨將可以建築

石塘之處一律改建石塘以資永久保障茲忽憶及該地方官及沿塘諸民見該處欲建石塘或視柴塘為可廢之工不但不加防護甚或任聽居民拆毀竊用致有損壞石塘未歲工之前於該處城郭田廬甚有關係且改建石塘原為保衛地方之計若留此柴塘以為重關保障俾石塘愈資鞏固豈不更為有益著該督撫即嚴飭地方文武官將現有柴塘仍照前加意保固勿任居民拆損竊用

增築徐州城外石工徐州居江南黃河上游北岸
居民稠密南岸緊靠府城黃河至此一束河面寬
八十餘丈大汛時甚闊緊要城外舊有石工七段
惟韓家山尚有空檔四百五十丈至是一律接築
石工自韓家山至奎山全資衛護

河臣陳輝祖言徐屬豐碭銅沛邳睢等廳漫堤平
堰之處現在保護平穩汛期已過乘此擇要加培
高厚方資抵禦從之

四十六年大學士公阿桂會同陳輝祖等奏仁和縣西塘海寧城東石塘七段遵

旨一律改建魚鱗石塘

直隸總督袁守侗奏文安大城霸州天津靜海安州新安雄縣武清等九州縣境內堤埝各工冲塌過甚需工較多之處照工賑例修築下部議行

展挑沈家窩河工時清河舊縣之玉皇閣埽土迤上河勢向走北岸冬間溜向南趨露有窩基數座

土人咸稱為沈家窰土性堅實就勢再為展寬與陶莊新河頭形勢更為直捷從薩載等請也

阿桂薩載等會議桃源廳屬臨河集之九里岡砂礪堅實中間橫亘千餘丈未免梗阻全河惟於北崖坐灣處自李家莊起至臨河集北首挑引河一道計長一千一百四十丈自可冲刷寬深疏入奉諭宜速為之

補修臨湖風損石工時揚河揚糧高堰山圩四廳

臨湖石工屢被風暴撞塌至是補修完竣

諭前以浙省老鹽倉一帶塘工是否可以及時接辦降
旨詢問阿桂茲據覆奏此段工程可以接續辦理浙
省辦理石塘二千二百餘丈計明歲冬間始可蕝工
其老鹽倉一帶塘工若一律築砌自應俟現辦工程
完竣後再行次第籌辦

四十七年

諭陳輝祖奏海塘頭圍開濬引河江潮暢順一摺所辦

甚合機宜可嘉之至海塘南岸淤沙綿亘從前歷辦引河迄無成效陳輝祖能督率司道等悉心講論辦理此段工程於南坍北漲之機切中竅要將來魚鱗石工告竣可以永期鞏固此事陳輝祖所見既確不待奏聞即督同屬員實力妥辦

又

諭據阿桂等覆奏豫省漫工另籌築堤改渠並嵇璜所奏秋間施工一摺內稱青龍岡漫口屢經變動形勢

敗壞已極是以遵旨於迤南一帶另籌去路自應及時辦理若於白露後開工恐水落歸槽不能掣溜且既有決口漫水下注即遇伏秋盛漲不能復有移改等語河工關係民生最為重大今據阿桂等奏於五六七三月內興工即遇雨水耽延亦可先得兩月工程並請現在應用民夫踴躍即東省災氓亦聞風雲集並可以工代賑各等語所籌皆是均應如所議辦理

又

諭前據胡季堂奏黃水灘出地畝甚多居民村落並皆耕種麥苗一遇水發勢必築圍打壩填塞自多且河身多一村莊即水勢少一分容納請勅下河南山東江南各督撫確查令其遷居隄外等語河灘地畝居民開墾日久必至填塞河身於河道甚有關係且居民廬舍佔據灘地猝遇水漲之時於民居亦多未便因特降諭旨令薩載等確加履勘其隄外地居高阜

者仍聽照常居住耕種若佔居堤內於水道有礙即
行明切曉諭俾陸續遷徙並令該督撫等妥為經理
毋致貧民失業因思灘地居民墾地結廬已非一日
若其目前無事安居已久不免安土重遷且河堤以
外均屬民田亦無隙地可以遷徙所有舊居隄內灘
地無礙河身者仍加恩准其各守舊業以副朕廕念
窮黎之至意此後毋許再行住居佔種

又

諭前據薩載奏開放顧家莊引渠分洩運中河水暢達
入黃情形一摺朕以該處引渠分洩上游漫口之水
既能得力即使掣動全河由此歸入舊黃河直注入
海似亦無不可因降旨詢問該處情形是否可以如
此辦理此朕廑念河防設為或然之想今據薩載覆
奏顧家莊所開引河分洩運中河之水入黃實為得
力若一經掣動全河則顧家莊至楊家莊口門此七
十里運道即不能通行舟楫必須經由黃河七十里

始行入運等語此等情節薩載熟悉彼處情形據實
入告所辦甚是自應照所議行

四十八年

諭此次曲家樓漫口為民生運道攸關特命大學士公
阿桂前往經理籌辦幾閱兩載因諭阿桂等於迤南
一帶另籌去路經阿桂等公同酌議於蘭陽十二堡
至商邱七堡共一百七十餘里另築新堤疏挑引渠
阿桂等原議本定霜降以前完工開放而堤渠並舉

需用人夫較多該地方督撫等屢請鄰省助夫朕洞鑑情形以鄰省助夫非便屢經降旨訓諭并展限緩至春間挑汎開放引河俾豫省夫役可以從容挑築停止他省撥派之煩阿桂等遵照辦理如期開放大溜全掣壩工堵合穩固此皆仰邀

天佑

神助幸得歲工朕欣感之餘益深虔敬

工部議續辦西塘海寧州境內自場字號至因字

號柴塘一千七百丈一律改建魚鱗石塘以垂永久飭該撫造冊送部先是大學士公阿桂等因場字號至名字號一千五百丈改築鱗塘而獨留立字號至因字號二百丈之柴工恐潮汐往來衝決究不抵石塘之足資捍禦請一律改建石工從之
四十九年

諭浙江建築石塘所以保障民生關係甚重前庚子南巡時朕親臨閱視指示機宜於老鹽倉舊有柴塘後

一律添建石塘四千二百餘丈次第興修於上年七月間告竣今抵浙後親臨閱看所辦工程不惟不應邀欵並多未協之處石塘既建自應砌築坦水保護塘根乃後之督撫惟云柴塘必不可廢此受工員慫恿為日後歲修冒銷地步況朕添建石塘原留柴塘為重門保障並未令拆去柴塘前降諭旨甚明也若如該督撫所言復加歲修又安用費此數百萬帑金添築石塘為耶又石塘之前柴塘之後見有溝槽一

道現有積水並無去路將來日積日甚石塘根腳勢
必淹浸滲漏該督撫亦並未慮及又石塘上有堆積
土牛甚屬無謂不過為適觀起見無當實際設果遇
異漲又豈幾尺浮土所能抵禦耶所有塘上土牛即
著填入積水溝槽之內仍將柴塘後之土順坡斜做
祇需露出石塘三四層為度并於其上栽種柳樹俾
根株蟠結塘工益資鞏固如此則石柴連為一勢即
以柴塘為石塘之坦水至范公塘一帶亦必需一律

接建石工方於省城足資永遠鞏固著自新築石塘
工止處之現做柴塘及挑水段落起至硃筆圈記處
止再接築至烏龍廟止一體添築石塘撥給部庫銀
五百萬兩連從前發交各項帑銀交該督撫據實核
算仍予限五年分段從東而西陸續修築以期海疆
永慶安恬生民益資樂利

又

諭據薩載李奉翰奏江南河工預籌修防蓄洩機宜辦

理工程三處已於圖內詳悉批示並面諭該督等遵辦矣天然牖下既舊有引河年久淤墊理應一律疏濬深通以備盛漲之年開放分洩自當首先辦理方為有備無患其所奏外河順黃壩堤工後深塘用土填平並於迤下估築新堤一道是應次第辦理以資保障

江西巡撫伊星阿奏南昌新建鄱陽餘干建昌等六縣下游地接鄱湖又當章貢諸水之衝圩堤冲塌

田禾被淹請借項修築下部議行

五十年挑挖昆陽海口工程工部議准雲南巡撫
劉秉恬奏滇池在雲南省城之南周圍三百餘里受
昆明六河之水會為巨浸附近昆明呈貢晉寧昆
陽四州縣環海田疇資以灌溉者不下數百萬頃
所恃以宣洩者惟在昆陽州之海口大河為填池
出水咽喉疏通則均受其利壅遏則即受其害應
自龍王廟至石龍壩共長二千七百七十五丈應

它一二尺至四五尺不等以資宣洩從之

河南巡撫畢沅奏查賈魯河即在古汴水發源滎陽縣之大周山會京字等水經鄭州中年祥符至朱仙鎮下達尉氏扶溝西華淮寧之周家口商水項城沈邱至安徽省潁州正陽關入淮又賈魯河自中年縣西十五里分支為惠濟河經祥符陳留杞縣睢州柘城淮寧鹿邑至安徽亳州會陽河入淮各計長四百餘里此河淤塞為開封等府屬商販

民食攸關今既久經淤淺自應及時開濬且於水
早年時兼可以資蓄洩從之

皇朝文獻通考卷九